

## 每週經課朗誦經文（巴克禮漢羅/教羅）2012/04/15

### 共同經課-1 使徒行傳四章三十二節～三十五節

32 信 ê 人 lóng 一心一志；無人講伊所有 ê 屬家己；是 tak 項物做公 ê。33 使徒用大權能干證主耶穌 ê koh 活；眾人也得 tiòh 大恩典。34 其中無欠缺 ê 人；因為見有田園厝宅 ê，lóng 賣伊，帶 in 所賣 ê 銀，hē tī 使徒 ê 腳下；35 照 tak 人所欠用，分 hō in。

### 共同經課-2 詩篇一三三篇

1 上崎 á ê 詩；大衛所做。1) 看 ah，兄弟和好相 kap khiā 起，是何等 ê 好，何等 ê 安樂！2 這 thang 比並 hit-ê 貴氣 ê 油 thîn tī 頭殼頂，流到嘴鬚，就是亞倫 ê 嘴鬚，Koh 流到伊 ê 衫 á 裾。3 也 thang 比並 Hek-bûn ê 露水，落 tī 錫安 chiah-ê 山；因為 tī-hia 耶和華有定 tiòh 賜福，就是永遠 ê 活命。

### 共同經課-3 約翰壹書一章一節～二章二節

1 論到活命 ê 道，tùi 起頭所有，阮所聽見，親目所看見，所觀看，也阮 ê 手摸 tiòh ê；2(chit-ê 活命 bat 出現，阮有看見來做干證，也報 lín 知 hit-ê 永活 ê 活命，就是本 kap 父 tī-teh，也出現 tī 阮 ê)。3 阮將所看見所聽見報 lín 知，beh hō lín kap 阮交陪，koh 阮所交陪，就是 kap 父以及伊 ê Kiáⁿ 耶穌基督；4 阮寫 chiah-ê，是 beh hō 阮 ê 歡喜充滿。5 阮 tùi 伊所聽 ê 話，來傳 hō lín ê，就是講，上帝是光，tī 伊 全然無暗。6 咱若講，有 teh kap 伊交陪，也行 tī 烏暗，就是講白賊，無行真實；7 獨獨咱若行 tī 光明，親像伊 tiàm tī 光明，就咱 saⁿ-kap 交陪，也伊 ê Kiáⁿ 耶穌 ê 血洗除咱 lóng 總 ê 罪。8 咱若講無罪，就是騙家己，真理也無 tiàm tī 咱。9 咱若認咱 ê 罪，伊是真實公義，beh 赦免咱 ê 罪，洗除咱 lóng 總 ê 不義。10 咱若講未 bat 犯罪，便是 hō 伊做講白賊 ê，伊 ê 道理無 tiàm tī 咱。1 我 ê 細 kiáⁿ ah，我寫 chiah-ê hō lín，是 beh hō lín 無犯罪。若有人犯罪，就 tī 父 ê 面前咱有保惠師，就是義人耶穌基督；2 伊為 tiòh 咱 ê 罪，做挽回 ê 祭；koh m̄-nā 為 tiòh 咱 ê 罪，也是為 tiòh thong 世間。

### 共同經課-4 約翰福音二十章十九節～三十一節

19 Hit 日就是七日 ê 頭一日，已經暗，學生因為驚猶太人，就 tī in 所 toà ê 所在關門；耶穌到，khia tī 中間，kā in 講，願 lín 平安。20 已經講 chit-ê 話，就用手 kap hiáp 下 hō in 看。學生看見主，就歡喜。21 耶穌 koh kā in 講，願 lín 平安；我差 lín，親像父有差我。22 已經講 chit-ê 話，就對 in pùn 氣講，Lín 受聖神；23 lín 赦甚麼人 ê 罪，就赦去；留甚麼人 ê 罪，就留 teh。24 有多馬稱做 Té-thó-má ê，是十二學生 ê 一個，耶穌到 ê 時，伊無 saⁿ-kap tī-teh。25 其餘 ê 學生就 kā 伊講，阮 chiah-ê 已經看見主 lah。但是多馬 kā in 講，我若無看見伊手中釘 ê 跡，無用我 ê 指頭 á 探伊釘 ê 跡，無用我 ê 手探伊 ê hiáp 下，我決斷 m̄ 信。26 過八日，伊 ê 學生 koh 再 tī 厝內，多馬亦 tī-teh。門已經關，耶穌到，khia tī 中央，講，願 lín 平安。27 就 kā 多馬講，伸你 ê 指頭 á 來看我 ê 手；伸你 ê 手探我 ê hiáp 下；莫得做 m̄ 信 ê，tiòh 做信 ê。28 多馬應講，我 ê 主 ah，我 ê 上帝 ah。29 耶穌 kā 伊講，你因為看見我 chiah 信；hiah-ê 無看見來信 ê 人，有福氣。30 耶穌 tī 學生 ê 面前，koh 有行 choē-choē 神蹟，無記 tī chit 本冊 ê；31 獨獨記 chiah-ê，hō lín 信耶穌是基督，是上帝 ê Kiáⁿ；信，就 tī 伊 ê 名得 tiòh 活。